

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

MIŠLJENJE

po Zahtjevu privrednog subjekta Nova Ljubljanska banka d.d. Ljubljana

**Sarajevo,
maj 2020. godine**



Broj: 01-26-7-003-2/21
Sarajevo, 17.05.2021. godine

Konkurencijsko vijeće Bosne i Hercegovine, na osnovu člana 25. stav (1) tačka f) Zakona o konkurenciji ("Službeni glasnik BiH", br. 48/05, 76/07 i 80/09), a po Zahtjevu privrednog subjekta Nova Ljubljanska banka d.d. Ljubljana, Trg republike 2, 1000 Ljubljana, Republika Slovenija, zastupana po Advokatskoj firmi Sajić o.d. Banja Luka, Bulevar Vojvode Živojina Mišića 49b, 78 000 Banja Luka, zaprimljenog od strane Konkurencijskog vijeća dana 26.04.2021. godine pod brojem: 01-26-7-003-1/21, na 87. (osamdesetsedmoj) sjednici održanoj dana 17.05.2021. godine, je donijelo

MIŠLJENJE

Privredni subjekt Nova Ljubljanska banka d.d. Ljubljana, Trg republike 2, 1000 Ljubljana, Republika Slovenija, (u daljem tekstu: Nova Ljubljanska banka ili Podnosilac zahtjeva), zastupan po Advokatskoj firmi Sajić o.d. Banja Luka, Bulevar Vojvode Živojina Mišića 49b, 78 000 Banja Luka, podnio je Konkurencijskom vijeću Zahtjev za davanje mišljenja broj: N-99/20 od 22.04.2021. godine o primjeni propisa u oblasti tržišne konkurencije (u daljem tekstu: Zahtjev), zaprimljen dana 26.04.2021. godine pod brojem: 01-26-7-003-1/21.

U Zahtjevu se u bitnom navodi sljedeće:

- Rješenjem Konkurencijskog vijeća br. UP-06-26-1-013-16/20 od 23.11.2020. godine („Rješenje“), odobrena je u skraćenom postupku koncentracija učesnika na tržištu koja je nastala sticanjem neposredne pojedinačne kontrole od strane privrednog subjekta Nova Ljubljanska Banka d.d. Ljubljana, Trg republike 2, 1000 Ljubljana, Slovenija, registrovanog u Privrednom registru Slovenije pod brojem 5860571000, nad privrednim subjektom Komercijalna banka a.d. Beograd, Svetog Save 14, 11000 Beograd, Republika Srbija, registrovanog pri Agenciji za privredne registre Republike Srbije pod brojem 07737068 („KB“), kupovinom (..)**1% običnih akcija koje Republika Srbija posjeduje u KB-u („Transakcija“).
- Transakcija je okončana 30.12.2020. godine potpisivanjem Ugovora o prenosu akcija i prijenosom vlasništva (..)**% običnih akcija u KB-u Novoj Ljubljanskoj banci i to registracijom navedenih akcija na vlasničkom računu Nove Ljubljanske banke otvorenom kod Centralnog registra depa i kliring hartija od vrijednosti Republike Srbije.
- Nakon toga, na osnovu Rješenja Komisije za hartije od vrijednosti Republike Srbije o odobrenju objavljivanja ponude za preuzimanje akcija br. 1/2-102-690/13-21 od 09.03.2021. godine, Nova Ljubljanska banka je dana 11.03.2021. godine objavila ponudu

¹ podaci predstavljaju poslovnu tajnu u smislu člana 38. Zakona o konkurenciji

za preuzimanje preostalih (.)**% običnih akcija KB i (.)**% preferencijalnih akcija KB, te je kao rezultat sprovedene ponude za preuzimanje, koja je zatvorena dana 09.04.2021. godine, povećao učešće u KB na (.)**% običnih akcija.

U Zahtjevu se dalje navodi i da:

- KB posjeduje (.)**% akcija u privrednom subjektu Komercijalna banka a.d. Banja Luka, Jevrejska broj 69, Banja Luka, registrovanom u Registru poslovnih subjekata pod brojem 11009778, PIB 4402503100008 (u daljem tekstu: „KB BL“), dok Nova Ljubljanska banka posjeduje preostalih (.)**% u KB BL.
- Nova Ljubljanska banka posjeduje (.)**% akcija u privrednom subjektu NLB banka a.d. Banja Luka, Milana Tepića broj 4, Banja Luka, registrovanom u Registru poslovnih subjekata pod brojem 01905155, PIB 4400949970003 (u daljem tekstu: „NLB BL“), dok su ostale akcije u vlasništvu manjinskih akcionara.

Nova Ljubljanska banka planira da do kraja 2021. godine dođe do integracije dviju banaka u Republici Srpskoj - KB BL i NLB BL (čiji je direktni ili indirektni vlasnik Nova Ljubljanska banka) i to tako što će doći do statusne promjene pripajanja KB BL društvu NLB BL, nakon čega će društvo KB BL prestati da postoji.

Navodi se dalje da bi Transakcija predstavljala tzv. „krovnu transakciju“ (koja je već odobrena Rješenjem) u odnosu na pripajanje koje bi predstavljalo dalju razradu Transakcije i faktičku integraciju NLB BL i KB BL. U slučaju pripajanja došlo bi do restrukturiranja unutar grupe, budući da je nakon okončanja Transakcije NLB BL ostao pod direktnom kontrolom Nove Ljubljanske banke kao i prije Transakcije, dok je KB BL potpao pod indirektnu kontrolu Nove Ljubljanske banka, preko KB-a, nad kim je Nova Ljubljanska banka stekla direktnu kontrolu realizacijom Transakcije. Suštinski nad KB BL neće doći do promjene kontrole.

Mišljenje Podnosioca zahtjeva je da, u slučaju pripajanja, ne nastaje koncentracija budući da učesnici u toj transakciji nisu nezavisni, već povezani učesnici na tržištu, odnosno budući da su oba privredna subjekta i NLB BL i KB BL već pod kontrolom Nove Ljubljanske banke, u smislu člana 2. stav 2. Zakona o konkurenciji. Dodatno, članom 12. stav 1 tačka a) Zakona o konkurenciji predviđeno je da se koncentracijom, u smislu Zakona, smatra spajanje ili pripajanje nezavisnih privrednih subjekata ili dijelova privrednih subjekata, što Podnosilac zahtjeva smatra da u konkretnom slučaju nije ispunjeno, budući da NLB BL i KB BL nisu nezavisni učesnici na tržištu.

Podnosilac zahtjeva smatra da, ukoliko se u konkretnom slučaju ne može primijeniti člana 2. stava 2. Zakona o konkurenciji, onda bi trebalo uzeti u obzir član 14. stav 4. Zakona koji navodi da će se dvije ili više koncentracija provedene u vremenskom periodu kraćem od dvije godine smatrati jednom koncentracijom (više sukcesivnih sticanja dijelova privrednog subjekta), izvršenom na dan posljednje od ovih koncentracija. Budući da je Ugovor o kupoprodaji akcija potpisan 26.02.2020. godine, te da je Transakcija okončana 30.12.2020. godine, a da će se implementacija pripajanja desiti do kraja 2021. godine, Podnosilac zahtjeva je stava da se navedeni član Zakona može primijeniti, te da nije potrebno Konkurencijskom vijeću podnositi novu prijavu koncentracije nakon što dođe do potpisivanja ugovora koji bi bio osnov za pripajanje.

Zahtjev se, shodno navedenom, odnosi na davanje stručnog mišljenja da li je transakciju predviđenu pripajanjem potrebno prijaviti Konkurencijskom vijeću, u skladu sa Zakonom o

konkurenciji. Postupajući po podnesenom Zahtjevu, analizom svih dostavljenih podataka i činjenica iz Zahtjeva, a na osnovu Zakona o konkurenciji, Konkurencijsko vijeće daje slijedeće mišljenje:

Zakon o konkurenciji u članu 12. propisuje koja postupanja na tržištu od strane privrednih subjekata predstavljaju koncentraciju dok član 14. istog Zakona propisuje koji se uslovi na tržištu trebaju ispuniti da bi postojala obaveza prijave koncentracije.

Koncentracijom, u smislu člana 12. stav (1) Zakona, smatra se:

- a) spajanje ili pripajanje nezavisnih privrednih subjekata ili dijelova privrednih subjekata;
- b) stjecanje kontrole ili prevladavajućeg utjecaja jednog, odnosno više privrednih subjekata nad drugim, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata, i to:
 - 1) stjecanjem kupovinom većine dionica ili udjela osnovnog kapitala; ili
 - 2) stjecanjem većine prava glasa; ili
 - 3) na drugi način, u skladu s odredbama zakona koji reguliraju osnivanje privrednih subjekata i njihovo upravljanje;
- c) zajedničko ulaganje na dugoročnoj osnovi, dva ili više nezavisnih privrednih subjekata, koji djeluju kao nezavisan privredni subjekt.

U smislu člana 12. stav (2) Zakona, stjecanje kontrole se ostvaruje putem prava, zaključivanjem sporazuma ili drugim sredstvima kojima jedan ili više privrednih subjekata, bilo posebno, bilo zajednički, uzimajući u obzir sve pravne i činjenične okolnosti, stječu mogućnost ostvarivanja dominantnog utjecaja nad jednim ili više privrednih subjekata.

Obzirom da je konkretnom slučaju riječ o pripajanju zavisnih privrednih subjekata, odnosno integraciji privrednih subjekata NLB BL, koji je u većinskom vlasništvu privrednog subjekta Nova Ljubljanska banka i KB BL, koji je indirektno u većinskom vlasništvu Nove Ljubljanske banke putem privrednog subjekta Komercijalna banka koji je već u vlasništvu Nove Ljubljanske banke sa udjelom od (...)*%*, statusna promjena pripajanja privrednog subjekta KB BL privrednom subjektu NLB BL nakon koje će privredni subjekt KB BL prestati da postoji, implicira da se ne radi se o koncentraciji u smislu člana 12. stav (1) Zakona o konkurenciji.

Slijedom navedenog, ne postoji obaveza podnošenja prijave koncentracije, shodno zaprimljenom Zahtjevu za davanje stručnog mišljenja.

Konkurencijsko vijeće, slijedom navedenog, daje ovo mišljenje isključivo na osnovu podataka navedenih u Zahtjevu, te ukoliko dati podaci odstupaju od stvarnog činjeničnog stanja ovo mišljenje se ne može primijeniti.

Predsjednik

dr. Stjepo Pranjić